

Morning Regional Dogri News Bulletin, 01st August 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. सांबा जिले च अंतराश्ट्रीय बन्ने कश सुरक्षाबलें इक पाकिस्तानी घुसपैठिए गी मारी मकाया ऐ।
2. एम्स जम्मू च अज्जै थमां ओपीडी सेवाएं गी शुरू कीता जा'रदा ऐ। बड़ी तौले गै एमरजेंसी सेवां बी शुरू करी दित्तियां जांगन।
3. उपराज्यपाल मनोज सिन्हा होरें कल स्वच्छता पंदरवाड़े गी शुरू करोआया जेह्दे तैह्त समूलचे केन्द्र शासत प्रदेश च बक्ख-बक्ख स्वच्छता अभियान चलाए जांगन।
4. जम्मू दे डिवीजनल कमीशनर रमेश कुमार होरें खित्ते च प्राईवेट ट्यूशन ते कोचिंग सेंटरें दे सुरक्षा हीलें ते कम्मकाज दा जायजा लैने लेई इक बैठक सददी।



Samba Infiltration

सांबा जिले च बीएसएफ नै पाकिस्तान कन्ने लगदे अंतराश्ट्रीय बन्ने पर इक पाकिस्तानी घुसपैठिए गी मारी मकाया ऐ। साढ़े जिला संवाददाता सतपाल शर्मा नै जानकारी दित्ती ऐ जे जंदी चिरे रातीं सांबा सेक्टर च खोआरा चौकी कश इक घुसपैठिया भारतीय इलाके च बड़ने दी कोश्ट करा'रदा हा ते भारतीय इलाके च अंदर बड़ी औने पर उसी गोली मारी दित्ती गई। होर ब्योरे गी बलगेआ जा'रदा ऐ।



AIIMS OPD

एम्स जम्मू जेह्दा उदघाटन प्रधानमंत्री नरेन्द्र मोदी होरें किश म्हीने पैहले कीता हा, दी ओपीडी सेवां अज्जै थमां शुरू होआ करदियां न। ओपीडी सेवाएं गी आजमाईश दे तौर पर पैहले गै शुरू कीता गेदा हा तां जे अस्पताल प्रशासन मरीजें दी दिक्खभाल च बेह्तरी आले खेत्तरें दी शिनाख्त करी सकै। ऐल्ले अस्पताल च तकरीबन 300 मरीजें दी हर रोज जांच कीती जा'रदी ऐ ते मेद ऐ जे औपचारिक तौर पर ओपीडी सेवां शुरू होने कन्नै एह गिनतरी बधियै हर रोज 3 ज्हार तगर पुज्जी सकदी ऐ। लोकें गी बेजोड़ सेहत सहूलतां

दस्तेयाब करोआने लेई अस्पताल नै अमरीका, जर्मनी ते होरने मुल्खें थमां उपकरण आयात कीते दे न। इस अस्पताल च 750 बिस्तरें, 193 आईसीयू बिस्तरें, 20 आपरेशन थेटर, इक हैलीपैड ते 1 ज्हार सीटें आला आडिटोरियम बी होग। एह्दे च एमआरआई, सीटी ते कैथ लैबाटरियां दी सुविधा बी उपलब्ध होग।



LG-Sinha

उपराज्यपाल मनोज सिन्हा होरें कल श्रीनगर च 15एं दिनें तगर चलने आले “ शुचिता संग्राम” नां दे पंदरवाड़े गी शुरू करोआया। इस अभियान दे उद्घाटनी समारोह दरान सिन्हा होरें सफाई कर्मचारिणं गी सम्मानत कीता ते स्वच्छता अभियान च सफाई कर्मिणं, आम नागरिकें ते होरने सरबंधत धड़ें दे महत्वपूर्ण जोगदान दी सराहना कीती। उपराज्यपाल होरें प्रदेश दे लोकें गी आखेआ जे ओह अपने ग्राएं ते वार्डें गी साफ-स्वच्छ ते हरा-भरा रखन ते ग्राएं-वाड़ें च पानी दी सुददी उपलब्धता बीजमीनी बनान। उनें आखेआ जे सब्बनें पंचैतें बश्कार सेहतमंद मकाबलेबाजी होनी लोड़चदी ऐ ते सब्बनें पंचैतें गी मकामी चुनौतिणं दे नबेड़े लेई भलेयां नमें किस्मै दे हल तुप्पने लोड़चदे न। उपराज्यपाल होरें “एक पेड़ शहीदों के नाम” स्वच्छता पंदरवाड़े दे दरान स्कूलें, कालेजें ते दफतरें च स्वच्छता सगंध चुक्कने, बस अड्डे, रेलवे स्टेशनं ते होरने सार्वजनिक थाहरें पर स्वच्छता अभियान, सेहत शिविरें ते स्वच्छता ग्राम सभाएं दा आयोजन बी करोआया जाग।



Udhampur SBM(byte)

भारत सरकार दिणं बक्ख-बक्ख महत्वपूर्ण योजनाएं सनें स्वच्छ भारत मिशन दे विचार बारे दूर-दरेड़े इलाकें दे लोकें गी जागरूक बनाने दे मकसद कन्नै कल सीबीसी आस्सेआ उधमपुर जिले दे लंडेर आले दूर-दरेड़े इलाकें च माहिरें दे लैक्चरें ते जादू आले कार्यक्रम दा सरिस्ता कीता गेआ। इलाके दे सरकारी हाई स्कूल च आयोजित ध्याड़े भरै दे इस कायक्रम च विद्यार्थिणं गी अपना घर, गली ते शिड़क गी साफ सुथरा रखने दियां केई मिसालां दित्तियां गेइयां। सीबीसी उधमपुर दे फील्ड पब्लिसिटी अफसर खुर्शीद युसूफ होरें सीओसी दे कम्मकाज ते ढांचे बारे ब्योरेबार जानकारी दित्ती।



DC Jammu

आम लोकें दे मसले नबेड़ने दे मकसद कन्नै जम्मू दे प्ठिी कमीशनर सचिन कुमार वैश्य होरें अरनिया तैहसील च कल ब्लाक दिवस आले कार्यक्रम दी प्रधानता कीती। कार्यक्रम च लोकें दे प्रतिनिधिणं, साबका पंचैती राज इदारें दे सदस्यें ते खरी मती गिनतरी च मकामी लोकें बी हिस्सा लैता। इस कार्यक्रम नै लोकें गी अपनी

आवाज सिद्धे प्रशासन तगर पजाने दा बड़ा गै बधिया मंच उपलब्ध करोआया ऐ। सरकार दिएं पैहलकदमिं पर लोह पांदे होई डिप्टी कमीशनर होरें लोकें दा दिल बधायी जे ओह प्रधानमंत्री किसान ऊर्जा, सुरक्षा ते उत्थान महा अभियान यानि पी.एम.कुसुम योजना कन्नै जुड़ियै ओहदा लाह हासल करन। डिप्टी कमीशनर होरें लोकें गी जकीन दोआया जे उंदे मसलें दा नबेड़ा चरणबद्ध तरीके कन्नै कीता जाग।



Block Divas Rajouri

राजौरी दे डिप्टी कमीशनर ओम प्रकाश भगत होरें हफतावार ब्लाक दिवस पैहलकदमी दे तैहत मंझाकोट ब्लाक च इक कार्यक्रम लोआया जेहदे च मकामी लोकें अपने मसलें प्रशासन अगगे रखे। इंदे च शिड़कें पर लुक्क पाने दी मंग, सरकारी इदारे दा दर्जा बधाने दी मंग, पानी दी कमी आली समस्या ते इलाके च सेहत ढांचे च बेह्तरी दी मंग बी शामिल ही। कार्यक्रम दरान मजूद अफसरें मकामी लोकें गी सरकार दिएं कल्याणकारी पैहलकदमिं बारे जागरूक बनाया। डिप्टी कमीशनर होरें लोकें गी जकीन दोआया जे जिला प्रशासन उनेंगी सब्बै बुनियादी सहूलतां उंदे घेरें कश उपलब्ध करोआने आस्तै अनकथ जतन करै करदा ऐ।



Div.ComJammu

जम्मू दे डिप्टीजनल कमीशनर रमेश कुमार होरें कल जम्मू प्रांतै च प्राइवेट ट्यूशन ते कोचिंग सेंटरें च सुरक्षा बवस्था ते उंदे कम्मकाज दी समीक्षा बारे इक बैठक सददी। इस दरान डिप्टीजनल कमीशनर होरें हर जिले च अतिरिक्त जिला आयुक्त दी अध्यक्षता च इक-इक कमेटी खडेरी जेहड़ी इस सरबंधै च अपने अपने जिले थमां इक रपोट तैआर करियै 7एं दिनें दे अंदर-अंदरजमा कराग। कमेटी दे मिंबरें गी निर्देश दित्ता गेआ ऐ जे ओ अपने अपने जिले दे सब्बने कोचिंग सेंटरें च जान, उत्थें सुरक्षा इंतजामें ते होरने बवस्थाएं दे बारे च पूरी ते तफसीली जानकारी हासल करन जिंदे च सुरक्षा सरबंधी बवस्था, निर्माण कम्में दे नियमं दी पालमा, सीसीटीवी कैमरें, अगग स्थालने दी बवस्था ते कुसै संकट दी घड़ी च बाहर निकलने दी बवस्था बगैरा शामिल ऐ।



Revenue Department

उपराज्यपाल मनोज सिन्हा हुंदी अध्यक्षता च लग्गी दी प्रशासनिक काउंसल दी बैठका च गैर मुमकिन खड्डें दे सरबंधै च जिमिं दे नक्शें ते नशानदेही लेई नमें सिरैआ तैआर इक नीति गी मंजूरी दित्ती ऐ। इस नीति दा मकसद ओकड़ी खड्डें गी बक्खरा करना ऐ जेड़ियां कुसै जल स्रोत दा हिस्सा नेई हैन पर प्रदेश दे राजस्व रिकार्ड च गैर मुमकन खड्ड दे रूपै च दर्ज न।



Amarnath Yatra

29 जून गी शुरू होई दी श्री अमरनाथ जी दी यात्रा पूरी चाल्ली रमानदारी ते बवस्था आले ढंगै सिर जारी ऐ। कश्मीर घाटी च बालटाल ते पहलगाम दौनें रस्तेया श्रद्धालुएं दे पवित्र गुफा लेई ओने जाने दा सिलसिला बरोबर जारी ऐ। ताई जम्मू थमां बीह र रोज यात्रिएं दा जत्था घाटी लेई रवाना होआ'रदा ऐ ते अज्ज बडलै कोई साढ़े क 3 बजे 1 ज्हार 295 श्रद्धालुएं गी लेइयै इक होर जत्था सख्त सुरक्षा बंदोबस्तें हेठ जम्मू दे भगवती नगर आले "यात्री निवास" थमां 48 गड्डिएं दे काफले च रवाना होआ। जत्थे च 1 ज्हार 66 मर्द, 182 महिला, 42 साधु, 14 साध्वियां ते इक ट्रोसजेंडर शामिल ऐ। इंदे चा 349 यात्री बालटाल ते 946 पहलगाम आले रस्तेया पवित्र गुफा लेई रवाना होंगन।



DC-Reasi

रियासी दे जिला विकास कमीशनर विशेष महाजन होरें कल प्रधानमंत्री मत्सय सम्पदा योजना बारे जिला सतह कमेटी दी बैठक दी अध्यक्षता कीती जेहदे च 2024-25 ब'रे लेई इस योजना तैहत ट्राउट मच्छी पालन सुनिट खडेरने बारे प्रस्ताह पर चर्चा कीती गई। प्रस्ताह दे बक्ख-बक्ख पैहलुएं पर सोच बचार करने दे परैंत पैनल नै इक ट्राउट मच्छी पालन युनिट तैआर करने दी मंजूरी देई दित्ती। एहदे इलावा मछेरे लेई घट्ट लागत आले 7 मकानें दे निर्माण दी बी मजूरी बारे सोच बचार कीता गेआ जेहड़ा इस्सै स्कीम दा हिस्सा ऐ। इंदा निर्माण कम्म, लोडचदी मंजूरी थहोने दे बाद शुरू कीता जाग जेहदा मकसद मछुआएं समुदाय दे रैहन सैहन दे स्तरै गी उबड़ा चुक्कना ऐ। डिप्टी कमीशनर होरें मेद प्रगट कीती ऐ जे एहदे सकारात्मक नतीजे दिक्खने गी लब्भगंन।



Kerala Landslide

केरल दे वायानाड जिले च जिमीं धस्सने दी इक बड्डी घटना च मरोने आलें दी गिनतरी ढाई सौ पुज्जी गई ऐ। भारती सेना नै दस्सेआ जे फसे दे 179एं जनें गी सुरक्षत थाहरें पजाई दित्ता गेआ ऐ ते वायानाड इलाके थमां चार लोथां बी बरामद कीतियां न। अज्ज बडलै अट्टामाजा, मुंदक्कई ते चुरालमाला च बचाह कम्म बी शुरू कीता गेआ। खोजी टीमें कन्नै 1 डॉग स्वाड बी तैनात कीता गेदा ऐ।



Indian Cricketer

भारत दे महान क्रिकेटर ते कोच अंशुमन गायकवाड हुंदा काल होई गोआ ऐ। ओह् 71 बरें दे हे ते ओह् कैसर थमां पीड़ित हे। गायकवाड होरें बड़ौदा आस्तै पैहली श्रेणी आले मैच खेडने दे अलावा 1975 थमां 1987 बश्कार भारत आस्तै 40 टैस्ट ते 15 इक रोजा मैच खेड्डे। गायकवाड भारतीय टीम दे चयनकर्ता रेह् ते मगरा अक्टूबर 1997 थमां अक्टूबर 1999 तगर भारत दे मुख् कोच रेह्। प्रधानमंत्री नरेन्द्र मोदी होरें भारत दे इस महान क्रिकेटर दे काल पर गैहरा दुख प्रगट कीता ऐ। अपनी इक सोशल मीडिया पोस्ट पर मोदी होरें लिखेआ जे क्रिकेट च उंदे नमुल्ले योगदान लेई अंशुमन गायकवाड होरें गी सदा सदा लेई चेता रखेआ जाग।

<><><><><><>